



FRidericus ille filius fuit Ernesti Archiducis Austriae, & Cymburgæ filiae Vitoldi ducis Lituaniae. Erat Cymburga mulier religiosissima, & supra muliebrem sexum fortis, utpote quæ digiti pulsu sæpe auellanam & iuglandem fregit, ac clauum parieti impegit. Natus est autem anno post natiuitatem Domini millesimo quadringentesimo decimo quinto, atque omnibus uirtutibus & disciplinis honeste educatus. Cum uerò septennis esset, pater moritur, atque ipse Austriae ducibus traditur, cum quibus etiam summa modestia uixit. Nã Styriae tantum gubernacula ei cesserunt, Alberto fratre in Alsatiam & Brisgaudiam misso. Quoniam uerò religioni esset deditissimus, & uitæ continentissimæ zelo quodam ductus, uidendi uestigia Saluatoris Hierosolymam nauigauit anno 1437.